

Դրանէ , եւ եթէ հարկ լիցի՝ Պատրիարքունք ծանուցեն
առ Պաշտօնեայն արտաքին գործոց , եւ յետ այնորիկ տնօ-
րինել զպարտ ու սլատչան : Իսկ արտաքին պաշտօնեայն
յազագս բառնալոյ զբազմամեայ խռովութիւնս երկուց
ազգաց , կոչեաց քանիցս զեկեղեցականս երկուց կողմանց ,
զի իրաւախօհ լինիցին . եւ զինի բազում բանից՝ Հայք թո-
ղին եւ ի բաց կացին ՚ի խնդրոյ զոյգ սանդխոց , իսկ վասն
մնացելոց հարցանել Արքայի , եւ նա հրամայեաց ըստ որոշ-
ման ատենին արդարութեան լինել հրովարտակ , եւ ըստ
այնմ գործադրել :

Մինչդեռ Հայք պատաղեալ զայսոսիկ խնդրովք դե-
գերէին ՚ի գրունս մեծամեծաց եւ յատեանս Տէրութեան ,
եւ խնդիրքն կարեւորք մերձ էին գտանել զլուծումն . այլ
միաբանք Յունաց արագեցին եւ կանխեցին այլ իմն չփո-
թութեամբ խափանել զայն եւ կապել ՚ի կնճիռն անլուծա-
նելի . դիմեցին մեծամեծ պատարագօք առ Կուսակալն
Սիդոնի (Սայտայ Վալիսի) Էսաա Փաշա , եւ բամբասանս
բարուրանաց եղեալ՝ մեծամեծ գանկատանօք ամբաստան
եղեն զՊատրիարքէն եւ զմիաբանութենէ Հայոց . թէ որ-
պէս յանդգնեցան առանց Բարձրագոյն հրամանի կախել
զկանթեղս յեկեղեցին Բեթղէհէմի . բանալ զպատուհանս ,
առնուլ զբանալի արտաքին դրան , եւ ՚ի սիւնազարդ սրա-
հէ եկեղեցոյն իջուցանել զկանթեղս Յունաց , այլովքն
հանդերձ . եւ նորա զիջեալ ՚ի կամս նոցա գրեաց առ Դա-
տաւորն եւ առ մեծամեծս Նրուսաղէմի . իջուցանել զկան-
թեղս Հայոց , չբանալ եւ չփակել զպատուհանս , եւ զաւել
ածելն վերստին յանձնել Յունաց , եւ ՚ի սիւնազարդ սրահն
վերստին կախել զկանթեղս : Ի հասանել այսր հրամանի
յերուսաղէմ , որսացին Յոյնք զմիտս Դատաւորին եւ մեծա-
մեծաց . գնացին բազմութեամբ ՚ի Բեթղէհէմ . բարձին
զկանթեղս ՚ի չլթայիցն Հայոց , եւ կախեցին զկանթեղս
Յունաց ՚ի սիւնազարդ սրահն եւ խափանեցին զոր միան-
գամ կարգաւորեալ էր հրովարտակաւ Արքայի . եւ պա-
տուէր ետուն Հայոց չլինել ձեռներէց յիրս ինչ ՚ի պատ-
ճառս որ եւ իցէ իրաց : Այս հակառակ եւ անպիտանելի հրա-
ման Կուսակալին առիթ եղեւ միաբանացն Հայոց դառն
վշտաց եւ անսրութեան , այլ ոչ եղեն յուսակտուր միան-